

四庫全書

集部

欽定四庫全書

集部

兩宋名賢小集卷九十八至一百

詳校官中書臣 閔思毅

助教臣 常循 覆勳

總校官編修臣

王燕緒

校對官中書臣

康儀鈞

謄錄監生臣

祁有恭

欽定四庫全書

兩宋名賢小集卷九十八

宋 陳思 編

元 陳世隆 補

龜山集中

假山

衡湘側南二千里清淑之氣常蜿蟺丹砂玉石氣所感  
融結萬狀非磨鑄窮深荒蹊異岱畎不逢禹蹟經棄捐

苔封土蝕誰復問嶙峋僵卧當市廛龜山老叟見之喜

鳩從輦置羅前軒宕嶢孤峰露仙掌

有一石如掌

屹若太華

青摩天傾岷斷壑坐中見葱蒨似玉生雲煙初疑祖龍  
未死日浮梁擬跨咸池淵神號鬼怒驅不前捶擊剝磷  
成枿圈又疑巨人出龍伯揭竿來自崑崙巖連鰲合負  
雲濤翻蓬壺簸蕩留平川繫予竟日倚欄檻矯首便欲  
追靈仙虎輪神馬自足駕已覺兩腋風冷然瓊臺浮游  
與世隔醉傲笑拊洪崖肩山間草木即靈餌含英茹實

資長年悠悠廣息變今古坐看溟渤成桑田

寄練子安教授

憶昨吾子客上都我獨奔走天南隅各年未壯已多累  
誤投世網身學拘飄零今日偶相值乃復咫尺不得與  
子俱人生委質金在爐大冶鼓鑄誰號呼惟愁跋跋走  
塵土舊業已廢成荒蕪惜君高才卓犖與世畸雄文洒  
落珠陸離雷驚電赫轉坤軸風號浪擊飛天池珊瑚挺  
榦滄海竭騏驎趨軼不可羈經綸有道世莫知犢中良

壁始自竒君不見扶藜隘巷蓬華居袒褐甕牖桑為樞  
擁門軒蓋何所慕恭羨自飽非癯如又不見揚雄寂寞  
守太玄弃捐覆瓿真可憐折腰小吏昔所耻田園須賦  
歸來篇終當結屋蒼崖巔期子相與臨清泉投簪解帶  
謝人世拂塵披蠹親遺編松皴檜老生青煙雨餘風弄  
鳴哀絃低回野興真有意浮名鶴雀過吾前結歡膠漆  
常連連從遊鹿豕終長年

送富朝奉還闕

紹榮字國華

君不見慶曆承平道如砥馳車八荒同一軌邊人鷓鴣張  
怒螳臂百萬雲屯若封豕又不見朔方橫流漲天起腐  
麥蛾飛木生耳扶攜道路雜老幼操瓢溝中半為鬼關  
河日夜刀斗驚嫚書乘駟來渝平兵間持節得英傑談  
笑坐使羈長纓青社環城萬區屋發廩分曹具饘粥飢  
羸枯頰陡生光叢塚不聞新鬼哭臧孫有後天匪親閭  
門容車何足論竭來灘上見猶子雄姿宛有典刑存驂  
騶已度渥洼水朝燕暮越應千里行看玉勒駕鑾輿濯

足瑤池從此始

寄游定夫

憶昨相逢鳳山址  
駒隙駸駸餘半紀  
君趨烏府近清光  
陸海驚濤漲天起  
雲帆大舸半摧溺  
臍舫得全誠偶爾  
我時捧檄赴京洛  
放浪江湖一浮蟻  
談書考古老無用  
哺啜糟醢咀糠粃  
東歸雖復有民社  
為米折腰良可耻  
市朝紛紛真羿穀  
朔幹燕弧不容擬  
投身中地竟誰免  
未信棘端能捍矢  
重樓百尺卧玄德  
問舍求田不須鄙



早歲結鄰初有約齒豁頭童今老矣  
菜田預想傍田廬  
負耒耦耕何日始

過錢塘江迎潮

銀潢翻空際天白  
鯤怒鵬騫海波擊湧雲噫氣聲怒號  
萬馬馳車隨霹靂  
低昂上下如桔槔  
頃刻性命輕鴻毛  
賫囊負笈有夷路  
一日何事常千舸  
因思羊腸盤九坂  
攀援蜀道愁玃  
猱人生觸處有萬險  
豈必此地多風濤  
願言夷險不須問  
莫負對酒持霜螯

和潭倅張朝請行縣言懷

夾道旌麾動陰霾萬里開  
霜迎威令肅春逐馬蹄來  
幽壑光初滿寒萋暖自回  
仰窺嵩華質曾未施纖埃

又用前韻和早梅二首

楚國春歸早寒梅處處開  
月和清艷冷天與靚粧來  
東閣詩魂動南枝歲律回  
蕭然冰雪態無處覓輕埃  
星使經行處梅花忽已開  
只疑春信早先擁使旌來  
嫩萼紅初破寒柯綠未回  
凌霜半含月皎皎絕纖埃

感事

邊徼無虞日王師討弗庭收功誇廟算行險毒生靈川  
谷旌麾暗風塵戰血腥寥歸馬日日斷華陽峒

虎士冰河側日聞刁斗驚氣吞沙漠盡風蕩賊巢傾關  
塞長年戍邊塵幾日清太平陳朽富一旅百夫耕

席上別蔡安禮

予方赴調安  
禮赴博羅仕

故里相看眼暫明一尊聊此話平生杜陵蚤被微官縛  
元亮今為世網櫻長路關山吾北去春風梅嶺子南征

結鄰莫負當時約早晚滄浪共濯纓

次韻安禮見寄

末俗相看老尚新交游千里更誰親  
蕭條身世聊安分迂濶行藏懶徇人  
宦路競羞關柝吏勞生誰息利名身  
我慚抱甕無機械幽興惟思水石濱

冬寒兩齒忽覺動掙因成書懷

未年三十髮先彫歲晚俄驚兩齒搖  
都為踈慵成計拙直緣衰病覺形焦  
連經宿雨重裘冷旋煮藜羹野興饒

擺脫塵樊猶未得不堪回首問漁樵

書懷

駸駸塵土久方還直道謀身力愈難  
靖節每嗟纓世網漫郎何意出人間  
風驚駭浪潛鱗伏竹隱灣磯翠羽閒  
好去杖藜穿蠟屐伴雲隨月弄潺湲

汴上

天上行雲曳白衣半銜晴日在林扉  
盤花落雁驚還起啄食飢鳥走不飛  
榆莢青錢飄已盡月堤流水漉相圍

征途處處塵隨眼多病長年與世違

陳留書事

烏檣風纜欲飛翔拍岸驚濤挽不前  
曲浦漲沙仍積凍  
疎林斜日自生煙崎嶇道路真堪笑  
放浪江湖已判年  
一枕晝眠無好夢空慙邊老腹便便

感事

桑麻腴地想榛荆騎士西來劍戟腥  
藜藿陋儒心更鄙  
但思干羽舞虞廷

藍田溪上

夾籬桃李趁溪斜  
淺淺清流映落花  
欲問武陵源上路  
度雲穿石認胡麻

白草堂

爐峰裊裊曉煙輕  
雲入屏幃一枕清  
高興自應無世界  
獨於妾馬未忘情

久旱

農郊阡陌起黃塵  
望斷天涯絕點雲  
踈懶無情訟風伯

金方下ノ二  
幽窓時讀退之文

過七里瀨

拂雲高雁倚風搏下視平湖萬里寬搔首扁舟又東去  
錢塘江上看波瀾

予自長沙還植蘭竹於東西軒調官京師逾年而  
歸蘭竹皆衰悴感而成詩

柴桑衰晚愛吾廬三徑歸來手自鋤但得叔卿長飽飯  
不妨孝若老談書蘭因採佩枝先瘁竹為凌霜葉自疎



留骨廟堂寧曳尾魯門無用祀爰居

和李倅游武夷

濃淡煙鬟半雨

一作雨半

晴溪光初借晚霞明鰲頭湧出三

峰秀

三層峰寂  
為秀拔

天漢融成一鑑清

魏王峰頭  
有天鑿池

粉社有誰

藏舊牒賓雲無處問遺聲慢亭寂寞仙何在勾漏丹砂  
早晚成

荊州書事

江湖泛泛一虛舟去作人間浪漫游歲晚光陰雲冉冉

畏途風雨日浮浮萬鍾信是樊中雉一棹聊同水上鷗  
投老藿藟成底事憑誰為種橘千頭

觀獵

貂裘白馬誰家子擁戟弦弧囊勁矢褰身欲與鳥爭飛  
觸起塵埃雲四起長繩驅逐狐兔驚驕鷹掣臂流雙睛  
飛揚雲間電光閃旋復草際無遺生鷲腸久厭鮮肥餌  
顧盼方能伺人意但矜鼎俎有餘甘貪殮誰憐殄生類  
安得淑氣回嚴秋徐令用拙同鳴鳩林間百鳥恣孳乳

雖欲擊搏知無由

寄范正甫

時討西夏

羈窮莫厭如牢圈從古功名出屠販男兒不負懸弧心

馬革裹尸猶足願君不見淮陰寄食飢貧叟

一作竊爪  
寄食淮陰

隻膀下英風亦何有逢時吐氣雷電奔金印纍纍大如

斗玉門晝夜羽檄驚脾脫欲墜天都城叩關虎士鬱餘

怒科頭奮戰如鷗鷹君從壯年蘊竒策未宜縮首歲柴

荆昔人投筆真豪英慨然萬里終成名南山白頭雖欲

老百獸遭之猶裂腦

吳子正招飲時權酒局不赴作詩戲之

寒爐火冷浮青煙勁風刮面如戈鋌凝陰不動天欲雪  
竟日兀兀成拘攣廣文才名四十年天寒坐客猶無羶  
參軍官小技能薄寂寞冷坐誠宜然望形杜老偶相覓  
傳呼歌舞開華筵嗟予簡書固可畏不得對飲簷花前  
漫有糟漿逆人鼻汝陽口角空流涎可能更似蘇司業  
只與時時送酒錢

勉懷

紛紛于我未忘情  
踈懶多應捨怨憎  
便好世間師柳惠  
不須巖下問孫登

梭山候潮

十一日潮起信  
是日潮小不到

向晚牛羊沙岼歸  
落帆煙浦候潮時  
誰言江上須忠信  
潮到于今自失期

徐郎廟

古廟靈場枕碧巔  
松楸依約鎖風煙  
羽毛一去無消息

隨落人間幾百年

送陳幾叟南歸

連塙東郭倦追尋  
高卧毘邪老病侵  
自愧屠龍真拙技  
漫令吾子費千金

霾風霖雨濕征裾  
隔雨棲臺半有無  
南去定逢韓閣老

歸愚當見問夷塗

是時幾叟過  
四明見了翁

幾年夢想到親闈  
身逐行雲萬里飛  
苔水未殊沂上樂

春風無負舞雩歸

初段  
餘杭

和陳瑩中了齋自警六絕

畫前有易方知易  
歷上求玄恐未玄  
白首紛如成底事  
蠹魚徒自老青編

八荒同宇混車書  
一視那知更有渠  
憑軾自應由砥道  
徑蹊無處問歸歟

行藏須信執中難  
時措應容道屢遷  
一日金牛無肯綮  
駉然投刃用方安

造次欲安嗟孰是  
參前無物若為書  
蕭條此意人誰問

興廢由來命也歟

聖賢事業學須強，俚耳由來笑折揚。  
說遇得禽非我願，但知無有是吾鄉。

盈科日進幾時休，到海方能止衆流。  
只恐達多狂未改，坐馳還愛鏡中頭。

閒居書事

輕風拂拂撼孤檉，庭戶蕭然一室清。  
隔葉蟬鳴微欲斷，又聞餘韻續殘聲。



送席二伊川壻

摠衣丈席想多聞高節應能與俗分不用卑飛入幽谷  
定知喬木在青雲

寄游定夫

絳帷燕侍每從容一聽微言萬慮空却愧猶懸三釜樂  
未能終此挹清風

蕭條清穎一茅廬魂夢長懷與子俱五里橋西楊柳路  
可能鞭馬復來無

卷六十八  
含雲寺書事六絕

獸駭禽鳴翦蔚中難將此意問鴻蒙  
縈回小徑蒼苔滑  
故屨從今恐不通

北山山下一漁翁  
形解心凝骨已融  
支枕睡餘人寂寂  
一軒明月滿窻風

山前咫尺市朝賒  
垣屋蕭條似隱家  
過客不須攜鼓吹  
野塘終日有鳴蛙

夾屋青松長數圍  
午風搖影舞僛僛  
幽禽葉底鳴相應

時曳殘聲過別枝

竹間幽徑草成圍  
藜杖穿雲翠滿衣  
石上坐忘驚覺晚  
山前明月伴人歸

蝶夢輕揚一室空  
夢回誰識此身同  
窻前月冷松陰碎  
一枕溪聲半夜風

荷花

照眼紅雲鬪晚霞  
重重青蓋半傾斜  
會須直跨三千仞  
移取峰頭十丈花

宜春溪

斜斜疎柳照清漪  
藉藉殘紅自滿蹊  
刺眼藤梢牽不斷  
欲尋流水路還迷

宜春道上

艷杏夭桃日日稀  
空餘淑氣尚遲遲  
誰人為作留春計  
莫放風花自在飛

過豐城

清江渺渺綠浮天  
博物無人繼昔賢  
應有斗間靈氣在

誰能更與斲龍泉

瀏陽五咏

洄淵浩蕩白鷗飛老懶時來坐釣磯  
岸幘行人聊自適不應憔悴似湘螺

右渭水

簾捲晴空獨倚欄冥鴻點點有無間  
秋風注目無人會時與白雲相對閒

右歸鴻閣

芙蓉彫盡蕙蘭芳杖屨條然一漫郎  
鳧鶴短長寧復問但知鵬鷃兩相忘

右飛鷃亭

柔條踈蔓綠交加煙鎖雲涵去路賒繡紱貂纓無處問  
空餘鷄犬兩三家 右相公堂

聖童去後水雲間陳迹難尋草木間獨有微言傳野史  
洞天寂寂在人寰 右洞陽 孫思邈修真所

荊州隅作

鄭公嵇阮流野性本麋鹿平生傲羲皇白首就羈束天  
寒客無羶官冷飯不足顧予支離人攘臂受餘粟江魚  
尾盈尺飽食勝梁肉荆山富樵蘇犬室有餘燠頑踈愧

前哲所得踰往躅談經追時好俯仰負愧忸流光逝不  
及愁鬢日改綠世道劫火燃不爐乃良玉晚交定難恃  
雲雨手翻覆官居真蘧廬東擔聊託宿求田意雖鄙此  
計正宜速歸尋谷口耕勝賣成都卜坐想帶經鋤倚耒  
聽布穀

送鄭季常赴太學正

驅車出西城眷言與君違北顧臨康衢問子將焉之赤  
驥度渥洼終當飲瑤池成都九軌道一躍不可追浮塵

暗荆棘捷徑行多迷長風戰秋林零露沾人衣青松不改柯期子清霜時

次韻何吉老遊金鑾寺

榮名嗟何為病木自生癭彭殤一夢覺烏用論久頃寄身淵明廬翛然在人境衛生鄙樊雉放浪任流梗相忘到形影世累不須屏到鍼聊自管寧復事干請負暄有餘燠蓬鬢亂垂頸客來坐無羶誰顧廣文冷忽聞過我門冠屨不暇整邀我招提游並轡相與騁僧關叩禪寂



未語心已領並游皆韓徒辭勿淬鋒穎多聞富如坻吾  
方拾遺秉願慚管窺陋未覩豹文炳謬追俊游後如渴  
得甘井願從借金篋為割眼生肯鼻端望漫久妙質愧  
非郢廩酬因詩律恐坐杜陵瘖相攜上層崗出戶畏深  
穽每虞參也魯蹕步輒三省遲回月初上雲間掛金餅  
昏鷄鳴相呼更覺林逾靜湖光湛星漢渺渺天水永歸  
蹊暗塵土回首失清景角聲下譙門歸步怯脩嶺晚市

人跡稀青燈耿踈影

金鑿有退之題名  
故有韓徒之句

題詩長老壁

維摩病士意超然  
邊腹便便但晝眠  
共說平時忙底事  
烹茶煮藥過殘年

出尉氏

隔村殘雪弄輕風  
日射晴光玉縷紅  
挑杏渾如梅欲綻  
直疑身在故園中

感事

權門車馬日紛紛  
寂寞多應笑玄白  
定知非世尚

解嘲即復彊云云

過廬山遇雨

江風吹雨逐人來，行過山前首重回。  
絕頂隔雲看不見，石稜崖角獨崔嵬。

送趙循道赴都講

鳳山鬱崔嵬，下有千頃波。

南陵鳳皇山大農陂溉田千頃

峻極不可攀。

浮光亘長鑿，晦冥滴風雨。  
澄澹含瓌竒，呼吸入君懷。  
萬態羅心脾，吐辭麗金瓊。  
煥若星斗垂，竭來荆渚游。  
紅葉

照清漪故宮久零落一洒增余揮惇族貴老成堯言下  
丹墀浮驟駕雲帆眷然成化離長裾曳玉門豈比困鹽  
齏驂駟踏長板萬里誰能羈

送胡康侯使湖南

北溟有潛鱗其廣數千里揚鬐厲東海汎汎等浮蟻百  
川競奔注漫不見涯涘寄之天地間大澤晷空耳胡侯  
荆山姿妙質文磬砥飛聲動旒冕持節照湘水功名與  
時會事道從此始驂駟駕輕車夷路道九軌朝燕暮騰

越快意未為喜聖門學須強一簣虧可耻擴之天地寬  
於道乃云邇為士貴弘毅無忘味斯音

寄題趙贊道後樂亭

亭在沂州新泰縣

叢祠有孤鳴羣雛滿東州彬彬齊魯郊不復論軻丘鼓  
刀販繒翁袞袞封公侯風流日凋弊世久俗益偷昔時  
帶經人輟耕仍佩牛推埋盡行盜閭里更相讎趙子尉  
平陽始止惟民憂百花爛成圍幽禽哢春柔問子胡不  
樂我心殊未休威明揉彊梗驕鷹化為鳩買犢解吳鉤

東身自鋤耨田廬戶無樞長物并不收結亭自樂只開  
編玩前修誰云酸寒吏憂樂非身謀乃知君子懷與世  
異沉浮嗟予一漫叟放浪猶虛舟舞雩有清風遺跡今  
在不君乎此去矣欲往將誰儔寄言春服成尚覬一來  
游

泗上

聞將開汴口

淮口平沙漲檣烏向日斜微雲變蒼狗輕浪感浮花風  
勁回飛雁林喧集瞑鴉河流應未閉遲我到京華

鬢蓬凋欲盡岸幘任歌斜瘦怯重裘重幘看細字花凍  
雲穿曉日晴樹繞飛鴉老大驚遲暮飄零惜歲華  
聞道河流閉逢人每問津天高雲幕幕風細水鱗鱗未  
種江陵橘空思千里尊且邀明月伴相對解綸巾

出京

旅泊驚秋意塵沙變客衣明星爛河漢殘月暗簾帷風  
柳斜斜轉雲帆片片飛窮愁添別病衰晚意多違

東林道上閒步

寂寞蓮塘七百秋  
溪雲庭月兩悠悠  
我來欲問林間道  
萬壘松聲自唱酬

百年陳迹水溶溶  
尚憶高人寄此中  
晋代衣冠誰復在  
虎溪長有白蓮風

碧眼龐眉老比丘  
雲根高卧語難酬  
蕭然大室無人問  
一炷爐峰頂上浮

江上夜行

赴荆南道

水壺漱灩接天浮  
月色雲光寸寸秋  
不用乘槎厲東海



一江星漢擁行舟

過石首謁縣官回有作

萬事紛紛醉即休無功可作酒泉侯誰能載取千缸去  
且向舟中打拍浮

偶成

綠鬢漸驚老境催更憐衰晚困低徊但知周道平如砥  
莫問瞿唐灩澦堆

兩宋名賢小集卷九十八

欽定四庫全書

兩宋名賢小集卷九十九

宋 陳 思 編

元 陳世隆 補

龜山集下

岳陽書事

洞庭水落洲渚出  
疊翠疏峰遠烟沒  
重樓百尺壓高城  
畫棟沉沉倚天闕  
湖光上下天水融  
中以日月分西東

氣凌雲夢吞八九欲與溟渤爭雌雄澄瀾無風雨新霽  
一日萬頃磨青銅琉璃夜影貯星漢騎鯨已在銀河中

湘妃帝子昔何許但有林壑青浮空

君山世傳湘君居于此因以得名

蒼梧雲深不可見遺恨千古嗟何窮須臾晦冥忽異色  
風怒濤翻際天黑乘陵瀨壑走魑魅渟滴百怪誰能測  
忽看舟子玩行險更欲飛帆借風力安得晴雲萬里開  
依舊寒光浸虛碧

南康值雨

廬山卧龍庵有劉道人自云百餘歲碧眼不粒食惟  
食栢飲水每客至必先知之欲往見之不果故并記  
之

平沙漲雪清江瀆水花照日紅生鱗軒然五老出城表  
雕玉萬仞窺長身雲巾星弁覆華頂飛泉漱瀑垂天紳  
平生未識廬山面碧巘橫雲望中見江頭一夜雨銜天  
奔浪號風作悲健朝來淤泥沒牛馬咫尺坐論千里遠  
芒鞋拄杖掛塵屋神馬尻輪歛飛轉卧龍庵前碧眼翁

日飲山淥餐溪松神融氣合八荒外此心炯炯宜先通  
未須勤移却俗駕會應一洗塵寰空寄言歸侍壺丘子  
他日未游當御風

游武夷

是日泛小舟至鷓窠岩還游冲佑觀

函闕崎嶇走秦鹿天下並逐爭羣雄抉雲翻空鰲足折  
黔黎竄伏如寒蛩武夷山深水清泚避世猶有高人蹤

龍泓東注海波涌

嶺有投龍池世傳與海通

玉女翠擁秋雲鬆

玉女峰

赤霄真骨寫虛壁通泉凡筆慙非工

魏王峯前有畫鴻

歲舟浮

梁跨絕壑

山間有小橋橋西有一小舟皆人跡不可到

隱見似與天潢通當

時雞犬不復見窠巖依舊烟霞籠我來秋杪月既望尚  
有幽菊埋榛叢天容洗淨雨新霽雲幕四卷清無風掀  
蓬進棹窮異境注目想見流殘紅回船杖履躡幽徑松  
竹竅宛環琳宮翠琬溫辭耀華袞

德詔有石刻

金榜大字纏

交龍自憐病骨掛塵網幔亭高會何由逢解衣歸卧玉  
瑣碎仰看明月穿疎蓬

謝詹司業送酒

鄭公負才名流落四十年高視隘八荒天寒坐無糧忘  
形賴司業時與送酒錢嗟予樗櫟材臃腫世所捐云何  
附青雲拜賜追前賢開壺對青樽內愧顏覲然公乎廊  
廟姿直幹上參天袷服羣娃宮不虞妬爭妍驛駟誤一  
蹶萬里終騰騫朝燕暮刷越駑馬安能先玉瑩本無瑕  
寧須事磨鐫宣室久虛席茲行定詳延陋儒氣填臆感  
慨聊自宣辱惠不知報強歌成短篇

戲贈詹安世

喜談兵慕耿弇之為人故有虎牙之句



綵舟駐閭門初與子相識長空翦秋隼爽氣橫八極搗  
辭鏤圭璋吐論森劍戟鄧侯不願仕志在書竹帛長纓  
係單于落落蘊奇策氣吞流沙外意無燕然北虎牙有  
餘勇戎寇非強敵會當朔風勁伏鉞控鳴鏑老大慙衰  
謝見子徒感激平生謬經綸此意已寥寂信哉功名會  
事道古難必窮通付時命未足為悅戚餘生如鼯鼠滿  
腹微分畢行矣脫簪纓脩然適吾適

安世乃司業之  
子年少未受官

隱几

上天不殞霜萬木正鮮澤青蒿與長松各挺歲寒節朔  
風吹沙寒高嶺凍積雪萬木已摧落長松獨清潔人生  
無艱危君子竟何別隱几試澄思行藏易差轍

留別富宣德

富侯荆山姿落落混燕石鵠磨經世故不磷乃天質軒  
裳儻來寄既去寧須戚驂駟走長坂一跌未為失秦庭  
謬瑕疵耽柱終完璧君子有遠懷事道先器識千鈞等  
鴻毛始見烏獲力行矣各勉旃他時賴三益

別西齋諸友

浮雲如積酥涼颼勁絃疾溶溶渺天末飄忽易相失懸  
弧四方志匏繫非予匹平生結歡久始願膠投漆別離  
傷素懷此身任萍迹

遣懷

君子雖自嚴至潔宜若汙昭昭揭日月所向將蝟如天  
地一穽中逼仄身亦孤游世在虛己浩蕩與時俱靈府  
有天游環中真道樞

元豐壬戌歲暮書事

閩陬地力盡種菽被山谷涵濡一雨潤鬱鬱原野綠春  
風忽云但舒景變炎燠涼飈動地軸擘歛何神速坐愁  
林巒空俯視萬木脫凝霜借風力摧折到松竹嗟余閑  
門人感此亦愁蹙幽庭有萱草采采不盈掬如聞糟牀  
注取醉須百斛沉酣樂時運天闕不須觸萬物一芻狗  
蒼蒼自高目

綠漪軒

開池傍清軒環除種蘭芷虛明淡星漢疎影薦鳧履君  
乎試憑軒鑑此亭下水溢風生微瀾風定還泚泚悠然  
得真趣吉祥來止止

迂疎堂

終南有捷徑屈蠖終當伸君獨恥不蹈安得與世親結  
廬寄人寰獨柱寧問津形影廢酬贈相忘誰與隣寄謝  
漢陰叟抱甕良非真

鄱陽湖觀打魚

秋高水初落鱗介滿沙脊浩如太倉粟寧復數以粒紛  
紛漁舟子疑若俛可拾橫湖沉密網脫漏百無十蟲鰕  
雜魴鯉駢首吐微濕小人利口實刀機汙鱗鬣鯢鯨亦  
狼狽風雨移窟宅玉淵有神祠變化在嘘吸胡寧飽羶  
香忍視萬魚急幽潛不足恃感嘆百憂集寄謝漆園吏  
於計未為得

送嚴尉

世路久艱棘青冥翳妖氛孤鳥叢祠中豺虎填城闥君

能摘姦伏竭澤無潛鱗勿云功未酬屈蠖終當伸飛黃  
架輕車一躍窮無垠

檢田

尋崙上層崗隨衝出高原烟火一里餘雞犬遙相聞瘠  
壤僅容席訟牒徒紛綸齊魏兩蝸角況復三家村舉世  
競毫末薄俗寧足論吾衰過元亮欲辨已忘言

送向和卿還京

江湖多秋風愴恍夜不眠念子將北歸起視明星懸君

平翠蚪姿聳身蒼梧淵高步隘八區凌風上青天妙質  
蘊荆璞寧須事磨鐫贈言以為別妄意追前賢聖言乃  
常珍含咀真味全奇辭暫時好過眼如飛烟潔身忘廉  
潔觸物宜虛船吾方病羸茶市藥還自憐明日隔長波  
相望空惘然

向和御覽余詩見贈次韵奉酬

杜陵頭白長昏昏海圖舊繡冬不温更遭惡卧布衾裂  
盡室受凍憂黎元詩人窮愁自古爾豈若種執依青門



嗟予老懶世不用窮巷久雨無高軒蟲鳴烏噪感時節  
娶不恤緯羞前言殘章斷簡棄不錄自愧潢潦無根源  
君胡袞字富褒飾三復妙語將誰論知君獨負青雲器  
欲使飢者名長存

贈程舍人近侍入閩

路公溪上鶴髮翁眼光照日顏如童  
龐眉垂鬢有仙骨  
駢集五福天所鍾  
螭頭暫輟三長手  
杖節扶輿入閩嶠  
孤南一夜晶輝浮  
海隅草木俱榮耀  
朱金拜後古所稀

卷九十九  
繡紱全勝衣綵衣玉觴薦壽須珍奇更待蟠桃結子時  
言溪早起

短日催征轡聽雞踏曉霜遠山頻入望薄酒漫搜腸湘  
浦蓴絲滑吳淞鱸縷長何時一踈放把釣卧滄浪

漢坂舟行

曲岸通幽徑踈籬映竹斜塢深巖吠犬林薄露人家石  
瀨魚偏美鄰村酒易賒祗應雲水富自是一生涯

席太君輓辭

賢配無前古傳家有子賢四靈來薦瑞一鷄已摩天  
萬里迷長夜悲笳慘暮烟蕭蕭原上路猶想駕雲駟

稟粹猗蘭秀來嬪洛水濱一窺識公輔三徒得儒真  
畫翬流雲氣松阡卧石麟哀榮今日事誰復繼前塵

湘君祠

烏鼠荒庭暮秋花覆短牆蒼梧雲不斷湘水意何長  
澤岸蒹葭綠籬根草樹黃蕭蕭竹間淚千古一悲傷

新湖夜行

平湖淨無瀾天容水中煥浮舟跨雲行冉冉躡星漢烟  
昏山光淡桅動林鴉散夜深宿荒陂獨與雁為伴

哀鴻

哀鴻當苦饑悲鳴垂其翼朔漠曉霜寒江湖晚烟暮乾  
坤一網罟高飛亦何益日暮無與羣驚風暗

缺

荊州書事

千里瀕江地可毛結廬何必故山椒載醪不過斜川路  
飲水誰同陋卷瓢勿問雞蟲閒得失但知鵬鷃各逍遙

黃塵滿眼僧窻靜  
坐對風花意已消

天寧節

祥開若水射瑤光  
淑氣先春景自長  
玉陛風閒飛綵綬  
獸爐烟暖襲珠囊  
雲門羽鶴儀仙仗  
天上蟠桃薦壽觴  
已見晶輝環帝座  
定應長照鼎宮傍

閒居書事

虛庭幽草翠相環  
默坐頽然草色閒  
玩意詩書千古近  
放懷天地一身閒  
踈窻風度聊欹枕  
永巷人稀獨掩關

誰信紅塵隨處淨，不論城郭與青山。

直舍大風書事寄循道

枕書無寐首空搔，萬竅噓風正怒號。  
雪意浮空迷遠目，月林梳影見秋毫。  
幽庭所藉惟荒草，妙理應須付濁醪。  
誰念維舟江上客，落帆千里壓雲濤。

和席季成遊金鑿寺

朱甍碧瓦照孤城，杖屨翛然野色清。  
穀捲水風輕蕩漾，珠翻荷雨自虧盈。  
勝遊已覺非人境，妙語寧須是玉英。

願借金篦聊括目不容幻翳有纖塵

送王充道遊三茅廬阜

荆吳相望各天涯千里柴車鹿自隨解轡定應春盡日

及歸宜待鶴來時

三茅中峯每歲八月十七日有鶴至充道當候見物乃可回

聖賢

莫負樽中淥日月長為物外遲若過匡廬訪真隱卧龍

庵下有期頤

卧龍庵有劉道人言百歲壽

春日有懷諸友

憑几無聊晝掩扉芬芬晴氣減春衣隔簾相應鶯初語

背日連飛鴈北歸莫逆交遊千里別遠來音信兩年稀  
追尋舊事成幽夢觸物心行事事非

望湖樓晚眺

斜日侵簾上玉鈎簷花飛動錦文浮湖光瀉出千峯秀  
天影融成十里秋翠鷗翻風窺淺水片雲隨意入滄洲  
留連更待東窻月注目晴空獨倚樓

次韻晁以道

誰能載酒尋元亮共寄無何作醉鄉便好收身事農圃



不須驚世露文章  
壺中日月春長在  
塞上烟塵客自忙  
千里同風無遠近  
未分秦隴與瀟湘

和錢濟明遊官園

虛舟觸物本無意  
看花得句慙非才  
名園古寺尋春色

不暈勿鄙雙魚鰓

是日與濟明過遊諸平詩院觀雙魚花抵暮至官園

木奴千頭

比封戶秋實付與江風催  
因思萬點愁人處  
何似洞庭

金作堆

蘇子美詩洞庭柑熟客分金

寄題環翠樓

記云唐君作此樓以奉觀

方壺七萬神鼇連瓊臺縹緲居靈仙鯨翻海運成桑田  
異境誰使夸娥遷銛風四面蒼圭圓巨靈巧以青瑤鐫  
揉風洗雨淨娟娟脩眉浮空秀爭妍清溪回旋瀉幽泉  
下有澄瀾湛洄淵繡楣雕欄欲飛翻凌切漢道摩星躔  
恍如直跨須彌巔瑠璃凝光圍四天喜君妙齡謝世喧  
萱堂慈顏白盈顛兒童牽衣戲踟躕優哉此樂誰與先  
嗟予昔以三釜懸投身世網百慮煎今乎老矣誠可憐  
狙猿何用簪纓纏子雲終須守一廛誅茅結屋纔數椽

薜衣雜佩紉蘭荃手披白蟬玩青編春暉不報常歛然  
雖有至樂安能全

晚雨

斷霞明滅天日黝雨意晴暉爭好醜浮雲冉冉無定姿  
白衣忽變如蒼狗悲風激烈河漢翻雨脚如麻飛霰寒  
山深氣腥豺虎亂乾坤四合誰云寬將溪溪上野客懶  
成癖怯寒手攣面如墨把盃強吞僵立歌閉門獨愁天  
已黑

贈醫者鄧獻匡

雲容方黯黯夜色正蒼蒼空羨南歸翼幽懷增感傷

過漢江

西極鰲足折東南地維傾衆流競趨下泓泓歸滄溟誰  
能跨明河挽此經天行世難乘槎翁此意終冥冥

過吳江

天水相涵翠有餘玻璃萬頃接方壺山浮晚照清如洗  
風遠飛帆細欲無漫叟未應甘皂櫂散人終欲傲江湖

維舟況值鱸魚美  
鱠疊銀絲  
飫腹腴

南歸書事

浪漫人間壓客塵  
衡門長憶鎖榆枌  
忘言擬盡輪人妙  
陳迹慵尋史籀文  
萬里功名心獨冷  
一廛耕鑿力能勤  
舊遊欲問南歸趣  
寂寞吾今過子雲

寸碧軒

隱隱遙山列畫屏  
簷間寸碧與雲平  
低回席上遺簪露  
彷彿牆東翠黛橫  
虛景遠涵千里色  
晚暉仍借一溪清

卷九十九  
春風景物知多少可稱收身樂此生

冬早書事

窈冥誰為宰爐鉅榮謝唯知歲序催臘日未經梅已綻  
春風尚遠凍先開愁無潤澤歸芳樹獨有餘寒著死菱  
收盡浮雲天愈淨夜深猶起望三台

齒落書懷

身上蕭條事事空齒牙衰落勝衰翁渴心尚欠冰凌解  
病骨長思藥力攻文几倦親塵土暗斷編慵理蠹魚封

南牀穩卧陶公宅枕上悠揚一榻風

縣齋書事

簿書投老豈身謀朱墨紛紛晚即休平世功名歸社稷  
一瓢我欲慕巢由

一去人間二十年空餘飛雪上華顛清時最有求田樂  
未愧陳登榻上眠

身名于我兩悠悠形影相忘懶贈酬擬把一竿滄海去  
漫然清世一虛舟

醴陵丁君洋洋亭

依蒲泳藻兩相忘  
宛有江湖氣味長  
凭檻脩然真得計  
祇應幽興在濠梁

安西聞捷

鷹揚塞外得非熊  
萬里金城一箭通  
玉帳投壺隨燕豆  
坐看飛將縛驍戎

將軍新擁節旄閒  
紫塞雲浮豹尾斑  
白首邊城休悵望  
馬蹄未出玉門關



雅歌不待來天馬謝質今應閉玉門  
早勒勲名上彘鼎  
放回春色滿乾坤

直舍書事

鱗鱗池面水初生萍底青蛙自在鳴  
誰使幽庭當鼓吹  
雨餘時聽作新聲

登峴首阻雨

羊公風績幾經秋獨遠龜蚨為少留  
欲問荆人尋舊事  
一江清泚自東流

江浮雲影抱層欄  
雲外青山一水間  
盡日倚欄看不足  
杖藜欲去更回還

江風江雨上雕欄  
庭樹蕭蕭景自閒  
向晚微雲遮不盡  
好山渾在有無間

庭前古木已經秋  
天外行雲暝不收  
倚杖却尋山下路  
一川風雨濕征鞦

春早

雲天幕幕漏微光  
踈懶惟添睡思長  
枕上隔籬聞鳥語

半殘春夢更悠揚

此身如幻病何傷  
白日無人景自長  
寄傲南窗容膝地  
時時飛夢到羲皇

過簷赫日晝如燭  
睡轉庭陰始一反  
縱有諸人來問疾  
毘耶居士已忘言

寄形一榻日遽然  
倚杖支頤髻指天  
莫逆過門無子祀  
時來鑑井自蹉躓

古椿朝菌已忘言  
貧病寧須更問天  
石彈不妨隨物化

自求鴟炙自應便

鄒公輓辭

一伏青蒲上三年漳海濱泉甘不出戶

公謫南方所居無水庭中忽湧

甘泉客醉豈無神

公在謫所忽有醉客言公將歸翌日赦至果得歸

報國心長在

知恩志未伸

公所居一名知恩

追懷垂絕語空有淚盈巾

舊德今誰在彫零已不多雲天開日月陸海自風波空  
嘆與齡夢難留曳杖歌生平濟川意無處問施羅

冬曉

著瓦霜華冷暝空曉霧均氣昏難見日風過易生塵洗  
硯冰紋破憑爐火色春莫嫌寒尚薄雨雪更愁人

兩宋名賢小集卷九十九

欽定四庫全書

兩宋名賢小集卷一百

宋 陳思編

元 陳世隆補

了齋詩集

陳瓘字瑩中南劔人也舉進士甲科為湖州書記久之用蔡卞薦召為大學博士遷校書郎章惇蔡卞主紹述之論追貶司馬光上謗宣仁后人不敵輒議瓘

因對以謂今日以前既往之迹便為古事道常然而  
不渝事有弊而必變故堯告舜舜告禹皆曰若稽古  
若者順而行之稽則考其當否或若或稽必使合於  
民情所以為帝王之治且論天子之孝與士大夫之  
孝不同哲宗感悟徽宗即位除右正言論下修實錄  
增加王安石實錄秦神宗大典請改修徽宗欲開言  
路首還鄒浩而中丞安惇尚緣往事欲格成命權再  
上疏力言宜召還浩遂惇以明黜陟遷右司諫又極



論蔡卞假託經義倡為繼述重誣神考輕敗先帝倡  
為國是以行其私卞之所是謂之國是卞之所非謂  
之流俗尊安石而薄神考不可為國是宜因其請祠  
許而遣之章惇懷異不忠宜因其辭山陵使罷之又  
言惇為山陵使無狀致大昇輿陷于泥淖之中露宿  
野次宜罷其職又論修建景靈西宮不當且言建立  
之地非是又言邢恕反復宜定其罪御史龔夬言蔡  
京罪朝廷不以夬言為然夬將去位瓘上疏言紹聖

以來七年間五逐言者皆與京異議今夫以言京又將罷去殆非祖宗獎勵言官之意皇太后已歸政權上疏謂外戚向宗良兄弟與侍從希寵之士交通使物議籍籍謂皇太后至今與政也罷監揚州糧料院改知無為軍權貴之日方裒疏論蔡京而命下于門外繳四奏并明宣仁誣謗修實錄建西京寺事徽宗密遣人賜權黃金百兩由是京罷召還除著作郎遷石司員外郎又以書抵曾布論實錄及國用事以為

尊私史而壓宗廟緣邊費而壞先政布怒罷知秦州  
尋主管冲佑觀除名編管袁州移廉州又移柳州監  
中獄廟坐其子正彙上書逮繫開封獄安置通州始  
瓘所辨日錄事著尊堯集議者以為言多詆誣編置  
台州移楚州居住以卒年六十五靖康元年贈右諫  
議大臣瓘篤學有識志不苟合居喪孝初蔡卞知其  
才待之加禮瓘不肯附麗恬於進取雖諸公交薦迨  
居言職所疏姦惡雖所舉不避也嘗曰彼則舉而所

知此則為仁由己識者重其言權既力言京不可用  
用之必為腹心患悉如其言權有詞辨通易數言天  
下治忽多驗自號了翁云

了齋自警言六首

本無一字堯夫易八十一篇揚子玄今古是非那復辨  
仲尼尤不廢為編

文書難寫伏羲書字外成篇始見渠賜也能分不可  
一瓢居士只如愚

過時不易始為難  
執處那知是變遷  
度盡千山無鳥迹  
不勞傳語報平安

手在何憂弓力強  
巧窮那得必穿楊  
太和有味人人飲  
誰識醒時是醉鄉

仲由行行終身誦  
師也堂堂帶上書  
五柳却能知此意  
無弦琴上賦歸與

只說為山不說休  
山成日夜水橫流  
惜哉覆篲成迷復  
只見當初一掉頭

自合浦還清湘寄虛中弟

三年已絕生還望一日天恩到海涯  
路過清湘猶閭闔當時何不住長沙

行徹天涯萬里山月明方照海珠還  
瘴鄉來往渾閒事聊為清湘一破顏

曾近滄溟看颶風波濤有盡海無窮  
四年陳迹今何在坐對湘雲豁晚空

瘴海只將梅作雪湘山今見麥為春  
晴空有月當如舊

嶺北山南總照人

與全州崇寧斷臂和尚

少年得髓幾人知  
想見當年斷臂時  
此是湘山大知識  
衡門堪繼會昌師

和劉太守十洲詩

花嶼

紅紫商量欲滿枝  
持春觴豆好攜持  
便須載酒凌波去  
底事黃堂獨賦詩

芳草洲

綠色映波千古恨至今南浦兩依依我今又出江東去  
多少行人宦未歸

柳汀

密幹參差籠月影輕波蕩漾蘸煙條暑天要此清涼地  
欲往何辭度小橋

竹嶼

霜姿迥出紅塵外只有鷓鴣傍水來別岸若尋棲隱處



軒窗須為此君開

煙嶼

靄靄紛紛綠底事  
故來波上罩晴沙  
莫教散入滄溟去  
却恐能迷上漢槎

芙蓉洲

紅雲可覓無蜂去  
渺渺寒波映晚芳  
未必孤根能耐雪  
且看秋艷已經霜

菊花洲

光景不留人易老恨無羽翼出塵埃世間那有飛昇藥  
且傍汀洲采菊來

月島

月明偏照海邊洲綠水迴環漾素秋斗轉參橫羣動息  
桂花零落遣誰收

雪汀

誰把平瓊水上開坐看飛絮撲瓊臺酒家耳熱笙歌沸  
應怪幽人此把來

松島

影參岸栢童童綠葉蔽汀蘭澹澹香斤斧不來人迹遠  
養成千尺勢堂堂

湖心亭

塵境紛紛俗累爭故尋幽徑訪南能湖波浩渺無窮綠  
寺屋高低不計層詩老新吟工惱客使君餘暇得陪僧  
碁中得失何時了一局輸贏未可憑



兩宋名賢小集卷一百

欽定四庫全書

集部

兩宋名賢小集卷一百一

一至四

詳校官中書臣 閔思毅

助教臣 常循覆勘

總校官編修臣 王燕緒

校對官中書臣 康儀鈞

謄錄監生臣 祁有恭

欽定四庫全書

兩宋名賢小集卷一百一

宋 陳思 編

元 陳世隆 補

初寮小集

王安中字履道陽曲人第進士政和中自大名主簿

累擢中書舍人翰林學士承旨出鎮燕山府召除檢

校太保大名府尹兼北京留守司公事靖康初貶象

金少曰人  
卷一百一  
州有初寮集

許道寧松

玉骨嶮岼雪作頂清溪下舞蛟龍影忽驚發地扶屋極  
誰向天公乞刀尺道人逸氣天雲高韋偃畢宏皆坐起  
奔崖斷壑皆睥睨悲風激激星勞勞胡為手挂卿高堂  
之素壁許侯筆興萬牛敵坐來一氣回霜秋四顧滿堂  
皆古色老夫卜築寄雲松屢揖伯鸞攜敬通忽見婆娑  
眼中物使我嚼句生天風千章竒材卧澗底公獨區區

悅其偽我知金石貫冰霜便與髯卿同一味君不見耳  
霞大士燒木佛此老胸中果何物

戒壇院東坡枯木張嘉夫妙墨童子告以僧不在  
不可見作此示

雪裏壁間枯木枝東坡戲作無聲詩雪川謫仙亦豪放  
酒闌為吐雲烟詞相傳秀色絕今古正如四月出盆絲  
老僧遮護不許見敲門游客遭慢欺我來擬看亦乘興  
興盡却還君不唾



王摩詰釣魚圖

我本江湖人市朝豈無心偶然墮世網如鳥思長林交  
視豈不多之子德我深賜沐有餘閒一馬時相尋茆亭  
容膝耳九衢可窺臨挂壁出古圖驚笑靡自任筆墨粗  
可識佳處疑非今佳哉王摩詰風味我所欽自狀釣車  
圖葦間相擊音有如漾波游一杜挾兩岑坐令黃塵中  
思落清江潏秦子詩思古清新聞雄沈示我五字句月  
杵鳴秋砧回盃勸摩詰對畫手自斟我子高趣子聆我

微譬如影與形妙在同一陰我時坐其旁清風溢幽襟  
歸來步長廊缺月戶半侵丹青已過鳥齒頰猶哦吟頰  
公有聲畫相我無絃琴

次秦夷行觀老杜畫像韻

寒折天吳圖饑糴太官粟拾遺官在朝何異老林麓英  
風想廉蘭妙手傳顧陸蒙茸頭傾冠駮駮銜脫作熊兒  
與阿段左右相扶逐生平經綸具悵望青蒲伏窮途付  
麴蘖放意謝羈束草堂幸無事君騎時見辱清吟動霄

鶚逸艷驚魚目顧茲神明意豈易丹青卜當時腰長鏡  
憔悴十指禿聲明乾坤破生事歲月促但聞列仙癯豈  
見肉食墨企予攀逸駕短步羞匍匐不能師廣袖乃爾  
好竒服嗜詩得雋永徐味自當肉不知褒公貴顧謂何  
郎俗窮通等夢幻思慮自根觸苦吟只效尤呼踐進蟻  
綠

題席大光所藏謝安石真

小兒破賊書能置此貌恐非山澤癯東土登臨猶可狀

新亭談笑若為摹，雖疑太傅平生在不比。司空少恨無  
只馮君真便相似，向來曾見管夷吾。

新畫八賢閣像

此地何從列姓名，半因新國用輕刑。江湖萬里知聞斷  
圖畫相看眼自青。

顏特約為范師厚，作孔明坐嘯圖。十大比丘像，顏  
者以為聲訛不可不下一句。

窮顏妙畫今虎頭，忽以武侯為范侯。他日却寫十比丘。

下筆不數僧貫休作佛作相三昧遊在江在海兩浮漚  
丈夫心機入法流到處還渠第一籌

題李伯時畫船子和尚

等個魚兒久未逢滿船明月一絲風離鈎三寸誰開口  
打落掀天白浪中

一橈打省猶回首露布須收人與船不著釣絲牽老會  
却留岸斗付龍眠

題顏持約畫四小景

梧山暮雪

一白空迷浩淼萬卷却立孱顏北渚曾遊帝子南巡更  
憶虞鯨

荔浦久陰

曾向荔支浦宿林紅間碧猶疑老矣少文欲卧咄哉王  
贊何如

桂嶺秋晴

海市當寒可出嶽雲正雨猶開故捲黃茅障盡為飛碧

玉簪來

梅村欲曉

暗射霏霏逆鼻荒雞喔喔號村萬里客行慄慄玉顏破  
霧相濕

題陽華岩圖

元子說陽華巉岩不可家此招吾已諾不恨客天涯

題陳去非王摩詰嘉陵圖

江山已暗大同殿絃管猶喧凝碧池別寫嘉陵三百里

右丞心事欲誰知

祁陽成逸畫浯溪圖相示為作長句

少文閱世老不自畫雲山滿墻壁澄懷觀道追所歷  
坐覺琴聲隱金石我亦七年湖外客夢中猶泛湘江碧  
浯溪之圖喜新得身卧嶺南心嶺北憶嘗留語溪邊僧  
異時人讀唐中興說與此乃秦典刑三句入韻之罟銘  
今欲復作誰可令似有元結無真卿風烟慘淡萬古情  
不如且尋畫隱成



李成山水

五日十日一水石此言雖工蓋其跡請看天地開闢初  
豈鑄日魂鎔月魄忽然而成隨所寓衲護風雲元滿肚  
吐為千偈口瀾翻遊戲法中同一趣李侯落筆風烟起  
妙處欲回真宰意扁舟不動水粘天落日孤明山若倚  
斷猿吟挂青楓林澗松倒卧長十尋白鷗似作終老計  
浮雲知自何年陰由來神器完天力一抹江流吞萬磧  
寸量尺度但形摹畫史如山爾何得貴人費盡千黃金

寶奩玉軸誰敢爭一聲常賣落公手世間得喪誰虧盈  
我生懶率便疎放只有幼輿岩石相他時真作畫中人  
倘辱書來問無恙

題趙大年金碧山水圖

王孫胸中楚七澤不學庸史誇水墨試開緹襲拂蛛絲  
半幅鶯溪射金碧余聞女媧煉石補天缺石破壓天天  
柱折五色墮地金嵯峨六鰲跨海吹銀波扶桑玉紅下  
天半貝闕珠宮紫雲滿桃花笑作十洲春劉郎此地聞

雞犬繫我不從天津槎自閱妙畫徒驚嗟迷魂一夜飛  
蝴蝶覺來半破蓬窓月

觀僧舍山茶

山僧手種兩山茶看到婆娑鬢已華應為客懷驚歲杪  
先將春色照天涯綠裁犀甲層層葉紅染猩唇艷艷花  
凍頰如丹相映渥不辭衝雨踏泥沙

兩宋名賢小集卷一百一

欽定四庫全書

兩宋名賢小集卷一百二

宋 陳思 編

元 陳世隆 補

紫微集

呂本中字居仁壽州人好問之子公著之曾孫也幼敏悟少長從楊時游酢尹焞遊以公著遺表恩授承務郎坐黨事被黜紹興初召見特賜進士累官中書

舍人權直學士院忤時相罷奉祠卒賜諡文清學者稱東萊先生

符離諸賢詩

窮居日荒涼杜門與世絕親故日夜疎詩書固宜缺符離雖陋邦賢士稍羅列德操青雲器議論輩前哲外貌發英華中心瑩冰雪介然特立士勁氣劉于鐵攘臂辯是非孰能逃區別信民粹而和名利誠難悅汨沒稠人中獨抱雲松節偉哉二三子實乃邦家傑我來從之遊

內顧慙疎拙欣然對三益  
放懷歌數闋已矣不須言  
渠當為君說

德操充之皆約九月間見過  
今皆未至扶杖出門  
悠然有感

病著文書懶出門偶扶藜杖看行雲  
屋頭日在轉花影  
水面風來散縠紋不厭莫城千嶂合  
稍令明月萬家分  
小庭留得清山在已見霜紅未見君

萬里江南雨外船長腰秔米縮頭鱖  
廣文繫馬無由去

更有何人贈酒錢

歲晚

野竹新開徑疎籬自著行暮寒收雨雪落日散牛羊生  
事顏公拙才名謝奕狂藥囊無奈汝春到莫相妨

晚步至江上

浦口生春綠未酣南山初見碧漸巖風聲入樹翻歸鳥  
月影浮江倒客帆破甑不堪充酒券短蓑真欲換朝衫  
往來泥雨城南路可見輕鷗定不凡

小園

小園常在眼春事已天涯  
雨暗堤前路苔深林外家  
曲池通小徑密樹隱殘花  
長愧鄰翁酒囊空尚可賒

謁雍道士

雍有古畫甚多畫為郡掾  
取去雍游貴人門甚熟

紛紛乾沒混泥沙不遣塵言挂齒牙  
妙畫已歸三語掾壯游空記五侯家  
古壇背日藏芳草小樹留春放晚花  
能共山翁同活計隔林分聽一池蛙

春日即事二首



隱几虛堂俗客稀  
片心真與道相宜  
風搖柳帶千絲亂  
雨勒花心十日期  
瘦病纔蘇休強酒  
良辰雖好少題詩  
賈生詞賦常流落  
歸去來兮在幾時

病起多情白日遲  
強來庭下探花期  
雪消池館初春後  
人倚欄干欲暮時  
亂蝶狂蜂俱有意  
兔葵燕麦自無知  
池邊垂柳腰肢活  
折盡長條為寄誰

夜作呈諸公

風江舞暮帆  
野樹散歸鳥  
寒燈上壁角  
疎星綴林杪  
歸

來靜無事獨坐搜默藁放筆有新功無人與傾倒不知  
新恨多但覺舊愁少石鼎倚殘爐茶烟看清裊明朝尋  
酒錢折簡喚諸老

知上獻傲軒

貪夫九鼎猶不足淵明一軒長有餘人生趣向等天壤  
鷓鴣腐鼠猜鷓鴣雛中郎妙處世不識風期自與常人殊  
開軒便有千載韵友葛天民無懷徒坐看松菊換時節  
兔葵桃樹紛榮枯五年却走各南北千里懷想空煩紆

雙魚沉浮久不至三徑寂寞今何如文章潦倒付丘壑  
疾病蹭蹬思江湖何時共坐北風裡煩君小摘園中蔬

新冬

西風吹禾黍落日在陋巷杖藜訪新冬霜樹眇空曠人  
烟村舍西旅店古原上晚山晴更好秀色常在望居閒  
得真趣日欲就疎放豈惟僧俗徒庶自免嘲謗東隣酒  
初熟清香亂盆盎徑須騎牆頭挈榼獻窮狀吾生足羈  
旅久病非少壯銀杯驚羽化布帆保無恙雖非陶潛隱

不負徐邈暢

廣陵

借韻戲用  
文潛體

往來六十里各自一江郊柳色團渦岼春風楊子橋好  
山當斷岼野鳥度空巢一任雷塘路暮天風雨號

勸張李二君酒

張侯好詩如好色不敢為主而為客李侯好酒如好詩  
心雖甚壯無人知兩侯風味俱不惡如芙蓉與木芍藥  
午牕留客看筆快曉枕無人猶睡著廣袖漸變天寶粧

大字不作元和脚世人譏笑乃其分政是仍叔之子弱  
病夫坐隱無所求荒簷斷雨鳴春鳩爐烟未盡消百憂  
恨不緩帶從公游何時清江橫小舟與公一醉荻花秋  
却來密菴參牧牛

登舟

夜雨曉猶滴怒風晴更吹已無行役念寧有別離悲舟  
楫三年路江山一月期東菴舊還往不廢百篇詩

贈浹上人上人

君行南山南我在北山北不聞浴鵠白但見染絲黑老  
境欲垂垂快意須得得孰知百雉堅而有一日克浹如  
澗底松縱老終不踣一如雲間鶴不復可羈勒我如千  
里風遇此兩鴻鵠明珠脫氛翳曉日破昏塞宿障不盡  
除胸次猶筆墨君看說詩口乃是杖山力冷霜卧偃蹇  
歲月飽封殖誰能窺藩籬未易得閩闕政當斂光芒不  
少須緣飾相從無何鄉敗衲依破衲更令好事人妙語

添一則

秋夜示李十

晴鳩不時鳴，雨鳩不暫歇。相去跬步間，屢見屐齒折。寒泥擁衰草，秋扇罷殘熱。今晨好風景，稍貸屋頭月。清光冷相照，玉艷滿金塊。喚客坐前牕，文字相澡雪。殷勤傍詩律，未暇了麩蘖。瀾翻談經口，邂逅如意鐵。我歌君輒書，字字有行列。不須陞桓嚴，但要兵衛設。譬如南山石，塚齒當并滌。真成一戰霸，未可三鼓竭。人生各涇渭，世事亦滕薛。高堂食肉人，兩馬方踈齧。何知緼袍底，猶有事。

不安節

王氏郊居

江山處處好落日極登臨  
雨續蔬畦潤風吹柿葉陰  
客船頻上下水鳥故浮沉  
尚有南飛雁丁寧可寄音

雨後至江上有懷諸子

落日滿寒雨長江收夕霏  
定知聊復爾敢望不相違  
野鳥晴相喚殘螢晚自飛  
殷勤兩山口好為放朝暉

奉送子之還京師



日月老投閒文字今削跡便然腰十圍欲吐喙三尺頗  
懷平生友相就語肝膈諸江好兄弟夫子眉最白詞林  
三二公子實門下客布帆千里來許我間賓席階庭出  
蘭樹戶牖照圭壁詩如駕高浪萬頃隨筆力寧為首陽  
餓不作璧奚獲乃知工語言要是飽糠覈茫然李杜壇  
未免陳蔡厄出門觀善陣斂手避勅敵澄江搖夜霜歲  
晚見沙石釵頭罨蛛絲即有梁宋役士生多艱虞道遠  
自古昔相期逍遙游不計天地窄名聲了三黜談笑供

百謫別君為此言可當統朝策

喜章仲孚朝奉見過十韻

苦語不難好舊交今則無但能留客坐已勝折腰趨只  
有連根煮初非滿眼酤苔痕記柱杖雪影傍跣趺語道  
我恨晚說詩公不迂丁寧入漢魏委曲上唐虞歷歷有  
全體忽忽或半塗真當置度外不敢望庭隅日月換新  
歲江山非故吾他年佳句在與畫密菴圖

山谷論作詩法當自舜臯

陶廣歌及五子之歌以下皆當精攷故予論詩必斷自唐虞以下

觀寧子儀所蓄維摩寒山拾得唐畫歌

君不見寒山子垢面蓬頭何所似戲拈拄杖喚拾公似  
是同遊國清寺又不見維摩老結習已空無可道牀頭  
誰是散花人墮地紛紛不須掃嗚呼妙處雖在不得言  
尚有丹青傳百年請公著眼落筆前令我琢句逃幽禪  
異時淨社看白蓮莫忘只今香火緣

題李伯時維摩畫像圖

老松攬天四無壁小菴不旁容一室野竹入戶芭蕉色

下有無言病摩詰文殊妙對亦無真身如浮雲那得親  
驚倒同行問話人彼上人者何所云龍眠好事筆有神  
不避世間狐兔羣掃渠世間千斛塵多口阿師聞不聞

伍負祠

伍負廟前一丈碑上有野鶴雙來棲水雲杳杳涼去遠  
風雨冥冥秋到遲江花相遍野花發舊燕不隨新燕歸  
丈夫遺恨竟何許楚越勾吳今是非

老松

奉君以綠綺琴報我以雙南金  
盃中琥珀不須盡聽妾一聲行路吟  
君看庭前老松樹上有杳默不斷之清陰  
牆低未礙髯髮古歲晚不辭霜雪侵  
東園莸李自研好與君百歲同此心

寄周司理

日月走動勩舟楫卧煩暑涼秋在萬里  
客子安得語周侯磊落人憐我自熬煮  
殷勤半月留可得一咲許別來今幾日  
坐此百里阻清風不時來曉月仍半吐  
卷簾看

新竹忽似對眉宇  
人生行樂耳舍此  
皆自苦終期卜隣  
歸重聽對牀雨  
雖無嗚嗚歌亦有  
坎坎鼓

山光寺前泊舟值雨

輕雷喚小雨憶在  
白沙時綠酒留連  
醉江燈取次詩好  
風那得有涼月自  
相隨獨上山光寺  
清歌無柳枝

送一上人之京師

東風吹雲十日雨  
卧聽城頭打衙鼓  
道人遠自山中來  
共坐南窓濯泥土  
自然高韵到羲皇  
豈止微言變齊魯

萬言回首不震掉一葉橫江且掀舞未能入水取蛟蜃  
尚欲投戈伐貌虎念公守此非一朝木病魄癩無枝條  
已盡千峯西嶺雪更夢八月錢塘潮京城塵沙深一尺  
是中莫留公履迹權門噂喏兒女咲我亦思之不能食  
片帆無事早歸來為公一洗山中石

京師贈大有叔

尊酒相逢十載前綠髮紅顏俱少年尊酒相逢十載後  
皮黃肉皺俱白首叔如鴻鵠但高飛姪似麕麕更深走

南來行李初一逢長安舊第冰雪中閉門不識故人面  
豪氣直欲輕元龍平生為道不為食小少所期皆目擊  
何時相就過江南同訪曾遊舊泉石

同晁季一李天紀過沈宗師北莊因成長韵

三年城南居不識城北土但聞王雪郎去作猿窟主今  
辰籃輿來握手相勞苦勝遊有佳士洗耳聽妙語晴窓  
背雲壑落日在環堵晚風生白楊想像原野古斷崖懸  
老木小港聚寒雨却觀城市人努力自熬煮畏途出衽



席禍福有未睹杜陵懷壯遊無忌咲豪舉二者覓真是  
政恐君未許千秋柴桑翁妙句聊一吐

斷雲

斷雲西南來好風東北去翩然兩無心空中忽相遇化  
為一尺雪照我庭前路昔者甚可憐今來渺無處故人  
多勸色留我不少住羈愁動中腸疾病增百慮虛庭著  
明月皎皎如積素不見東鷺子空懷舊烟霧

六月初三日雨後步至城東

涼秋生郊原快雨灑庚伏曲肱訪幽睡朝夢不可續開  
門招此山爽氣滿崑谷村溪沒衰草古院滿翠木東行  
得幽亭小徑來已熟下有十里濠暑退萬荷綠恨無沽  
酒錢一醉起枵腹人生要快意豈止寄幽獨君看後池  
蛙聲韻故不俗怡然共清歡何必絲與竹

歸計未成作詩寄懷

萬里田園半有無十年歸夢阻江湖文章謬忝聲名在  
氣體猶如藥餌扶容路因風滯舟楫水田無雨卧菰蒲

青帘白酒斜陽外不與行人滿眼酤

與吳迪吉諸人赴晁季一陳塘范園之游因成十

韵

春風未寂寞頻枉故人車客舍輕寒下村烟宿雨餘曉

紅留隱映新綠上扶疎妙墨懸高榜殘章得舊書

即所謂白

水滿時雙鷺下

蛟龍忽舒卷草木自清虛渺渺登臨地悠悠水

竹居只今那復有本自不關渠塘水空遺廟

塘即陳元龍所開今

有元龍廟在上

鼉淙亦故墟

園西有寺名鼉淙唐武宗時所建寺邊有鼉為水害

同行喜

佳士所到即吾廬政恐習池飲風流却未如

侯羸

游士縱橫翻覆手山東諸侯望闕走歷下邯鄲無使來  
長城易水非燕有大梁賓客舊如雲夷門監者未有聞  
漫將苦語送公子市井屠兒虛見存後來毫髮爭得喪  
紛紛小兒跨跌宕不知世有公子年一生放迹江海

古劍歌

寒江九日雷殷空落日倒射千山紅江頭樹木半傾倒

金匱要略卷之八十一  
卷一百二  
袞袞不盡洪濤風風中有物如長戟電光忽來傾霹靂  
雨罷晴開不復知乃是潛蛟倚長石蒼皮半卷頗飛動  
澁蘚中開欲跳擲青螢野火下絕水夭矯長烟轉空壁  
天生神物有時出歲月飄流為誰得銅花欲盡秋水渾  
尚有千年妖血痕向來天地亦兒戲俄頃變怪徒紛紜  
君不見豐城之水亦不久寶氣何為上牛斗

夜坐

廣陵城中聽夜雨倒牀不寐問更鼓西風萬里卷長河

遍與淮山洗塵土淮南米賤魚亦好敢問摧頽歎羈旅  
重簾複幕嬾相負細字寒燈且如許漫如爾雅注蟲魚  
更就篇章考齊古粗知俛首受寒餓未暇著意尋豪舉  
牀頭有酒不敢飲况復閨門畫眉媿故人此去今幾時  
亦有文字相撐拄東明縣前濟陽路每一夢至猶能數  
少年不憚道里遠平生未省別離苦只今多病鬚已白  
尚能呼渠醉而舞田園未還君可恨歲月漸晚我何取  
饑蟲遠壁不自聊爾獨何情促機杼

竹西亭

十年走塵土重上竹西亭  
草木新容態江山舊典型  
狂風掃毒暑落月伴疎星  
認取揚州路荒城一抹青

春晚郊居

柳外樓高綠半遮  
傷心春色在天涯  
低迷簾幕家家雨  
淡蕩園林處處花  
簷影已飛新社燕  
水痕初沒去年沙  
地偏長者無車轍  
掃地從教草徑斜

久雨路絕賓客稀少  
聞后土祠瓊花盛開亦未果

一往也

卧聞更鼓濕不鳴曉窓但有推簷聲雲橫不放山入坐  
風怒欲倒江衝城東家酒熟花爛漫折簡喚客留娉婷  
街頭泥潦一尺許意雖欲往無由行儒生活計亦不惡  
蒲團堅坐到日落映窓香穗觸凝塵過眼文書開病膜  
明朝新晴有佳處穩看小檻翻紅藥無雙亭下一枝春  
玉潔霜清未寥廓閉門懶出君莫咲看汝多愁吾獨樂  
故人無事倘能來為君試舉舒州杓



已亥上元數同晁季一叔用清坐不出

北風凜凜吹月高萬木夜作窮猿號卧聽車馬起塵土  
愛此一室明秋毫小爐著火晚收稻短檠照坐寒無膏  
主人忘言客亦懶更煩赤脚送茗盃子雲事業本清淨  
維摩方丈常蕭散出遊苦畏今日閑歸坐略盡平生歎  
自知衰病損剛腸只要文書遮病眼公能却掃趨閒暇  
渠自低頭費牽挽明朝乘興尚能來咫尺吾廬不嫌遠

試院中呈工曹惠子澤教授張彥實

十日虛房罷送迎不知新雁已南征  
忍窮有味知詩進處事無心覺累輕  
殘葉入簾收薄暑破窓留月漏微明  
知公坐穩無他念識我階前拄杖聲

雪夜

政和六年

曹州城南三日雪半夜疾風吹石裂  
先生睡美喚不聞不信衾幃冷如鐵  
病妻索火少聲韻稚子吟詩應歌節  
殘書向人老可愛舊劍空在磨洗缺  
未能去尋泉石伴未用深藏狐兔穴  
新正已過今幾日歲事嬾復從人說

長江略無千里夢故人動有十年別相逢一嘆又艱阻  
所向端坐成癡絕城中諸公不相棄時有妙句扶衰拙  
頗知晴意在明日泥深不怕車轄折便當脫帽過君家  
共放南窓看新月一杯凍酒君莫辭預借炎威洗煩熱  
雨後數與李仲輔兄弟往來且約十七日同過士

特因成長韵

隣鷄再三鳴不改風雨晦東裝向前塗恐與泥濘會故  
人時一來共此一室內微已久已絕苦語或未遂子孫

甚竒古却立有餘地舊從伯氏游則已聞令季斯文倘  
未遠吾今盡憔悴相期無何鄉獲保清淨退藏身稠人  
中著眼世事外山空倚巖石雪立老杉檜往來相遇難  
更自少如意旦日過城南把酒公一醉

荷珠

誰倩亭亭著意擊風中零亂月中明渾無定處光偏潤  
正值圓時影最清曲檻落江歌一串橫塘點碧夢三更  
絕憐蕩漾波心裏添得連宵細雨聲

採菱詞

烟艇江湖網罟疎  
石磯風雨釣綸虛  
碧池漫鑿方通徑  
鱗冶聊巡供別儲  
詩客興來堪佐酒  
楚人夢去却多魚  
鴟夷聞道曾興越  
經濟還餘十倍漁

柳

含烟帶雨過平橋  
嫋嫋千絲復萬條  
張令當年緣底事  
風流才似女兒腰

簡寧子儀二絕

只愁老去被花惱更欲忘憂須酒澆何似山堂病居士  
閉門高枕過春朝

新晴欲上南樓月柳可藏鴉水蘸牆無限客愁芳草裡  
不知風雨阻斜陽

烹茶

水光欲盡琉璃影玉色初浮翡翠斑便覺麴生風味好  
小爐新火對蒲團

山水圖歌

君不見南江老龍夜不眠令我破屋開青天千巖倒壁  
卷角上一榻卻在洪濤前又不見江頭古木一尺圍猿  
猴接手懸高枝雨中寒蘆披靡去天際風帆先後歸陳  
生故是可憐人筆雖未到心已親南村北村渴欲死怪  
此一室無纖塵鄭虔祁嶽不解竒韓幹畫馬空名肥萬  
里咫尺君得之更看湘江雷雨垂

陳生欲畫  
湖湘圖

即事戲荅季一

斜陽著高柳環堵半黃昏小圃三年旱荒池一尺渾粗

知詩有味寧使婦無裨不信晁公子猶招楚些魂

季一詩云

思與諸公論人物  
試憑清議賦招魂

### 春風

春風隨長江一日行萬里蕭條起岷山歛忽度揚子江  
南千酒樓春風樓上頭金尊開翠幄青帘吹客愁長堤  
二月暖寒溪千古流紛紛桃李花處處作芳華不見梁  
間燕空悲王謝家

### 題淮上亭子



亭下長淮百尺深  
亭前雙樹老侵尋  
暮雲秋雁且南北  
斷壘荒園無古今  
露草欲隨霜草盡  
歸櫓時度去櫓陰  
秋風未免鱸魚興  
更有江湖萬里心

正月十五日試院中烹茶因閱溪碑

小爐方鼎蛙蚓鳴  
那知簾外東風驚  
亂雲初破盤鳳影  
缺月半墮春江明  
已驅簿領出門去  
更洗肝肺令愁醒  
大碑石字久寂寞  
高堂素壁空崢嶸  
坐看光焰掃塵土  
便覺冰霰臨窓屏  
文章斷絕聲氣在  
妙句直欲無蘭亭

嶧山野火燒欲盡瘞鶴半在江中陵不知此書更竒古  
反覆厭飫無譏評山精地神肯愛護至今歐虞來乞靈  
要令石鼓舉吉日不必細字臨黃庭生平訪古少如意  
對此自足忘經營世間兒女爭媚好紙上姓名誰重輕  
邇來半月得堅坐一室當行千里程南樓燈火漫明滅  
北里笙竽頻送迎儒生事業了不惡故人浮沉吾懶聽  
更闌更自取書讀喚起奴僕尋短檠

冬日雜詩

白日供多病青山且舊居柴門臨水靜風葉舞霜餘老  
練時情熟貧窮家計疎墻東端可坐炙背飽翻書

春景晴乃暝寒江曉不波雲山明客眼風露淨林柯紫  
塞傳烽急黃池帶劍多蒼生好蘇息天意定如何

懷從弟

折柳長亭今幾年一行作吏楚江邊音書頓逐歸鴻斷  
消息時因過客傳五嶺風溫吹瘴雨九疑雲濕卷愁烟  
每吟春草池塘句尚想詩成夢惠連



兩宋名賢小集卷一百二